

Pravilnik o disciplinskoj odgovornosti u auto, moto i karting sportu

I Opšte odredbe

Član 1.

Posebnim pravilnikom o disciplinskoj odgovornosti u auto, moto i karting sportu BIHAMK - a određuju se disciplinski prestupi, disciplinski organi za vođenje disciplinskog postupka, način i rokovi za podnošenje zahtjeva za pokretanje disciplinskog postupka, lica ovlaštena za podnošenje zahtjeva, sadržaj zahtjeva, način vođenja postupka i odlučivanja, vrste disciplinskih mjera i troškovi disciplinskog postupka.

Član 2.

Disciplinski prestupi su povrede odredaba Pravilnika o auto, moto i karting sportu BIHAMK - a, posebnih pravilnika, dodataka pravilnika, pravilnika takmičenja i poslovnika kojima se regulišu rad organa Komisije za auto, moto i karting sport, komisija i delegata na takmičenjima u auto, moto i karting sportu.

Član 3.

Organizatori takmičenja i druga pravna lica podliježu disciplinskoj odgovornosti ako je do izvršenja disciplinskog prestupa došlo radnjom ili propuštanjem dužnog nadzora od strane organa rukovođenja ili odgovornog lica, ili radnjom drugog lica koje je bilo ovlašteno da postupa u ime pravnog lica. Odgovornost pravnog lica ne isključuje odgovornost odgovornog lica.

Član 4.

Niko ne može biti kažnjen prije nego što bude saslušan, osim ako se, bez opravdanog razloga, ne odazove pozivu za saslušanje. Smatraće se da je neko saslušan ako na poziv nadležnog disciplinskog organa dostavi svoju izjavu u traženom roku. Nedostavljanje izjave u traženom roku tretirat će se kao odbrana ćutanjem.

Član 5.

Krivična odgovornost, odnosno odgovornost za prekršaj ne isključuje disciplinsku odgovornost.

Član 6.

Pokušaj će se kazniti blaže nego učinjeni prijestup.

Član 7.

Lice koje drugog podstakne ili mu pomogne da izvrši prestup, kažnjava se kao da je prestup samo učinilo.

Član 8.

Nakon proteka 12 mjeseci od izvršnog prestupa ne može se pokrenuti disciplinski postupak, niti voditi nakon proteka roka od 18 mjeseci, od dana izvršenog prestupa.

Član 9.

Ako izvršilac disciplinskog prestupa, koji je kažnjen, u roku od dvije godine po prestanku kazne ne učini novi prestup, smatrat će se kao da nije bio kažnjavan.

II Disciplinski organi

Član 10.

Disciplinski organi za auto, moto i karting sport su: disciplinski sudija kao prvostepeni organi, i Disciplinski odbor kao drugostepeni organ, čija je odluka konačna.

Član 11.

Za disciplinskog sudiju može biti imenovan samo aktivni sportski funkcioner nosilac državne licence I ranga. Na takmičenjima u auto slalomu, moto - koncentraciji i kartingu ulogu disciplinskog sudije preuzima direktor takmičenja. Odluku o broju disciplinskih sudija i njihovom imenovanju donosi Komisija za auto, moto i karting sport. Disciplinski sudija ne može u vrijeme trajanja mandata obavljati ni jednu izvršnu ili nadzornu funkciju na takmičenjima odgovarajućeg ranga u grani sporta u kojoj obavlja funkciju disciplinskog sudije.

Član 12.

Disciplinski odbor imenuje Komisija za auto, moto i karting sport. Sjednicama Disciplinskog odbora prisustvuje, bez prava glasa, kao izvjestilac, disciplinski sudija.

Član 13.

Disciplinski organi su nezavisni u svom radu i odluke donose na osnovu utvrđenih činjenica, a u skladu sa odredbama ovog Pravilnika, Pravilnika o auto, moto i karting sportu BIHAMK - a, posebnih pravilnika i dodataka, kao i međunarodnih sportskih pravilnika.

III Zahtjev za pokretanje disciplinskog postupka

Član 14.

Zahtjev za pokretanje disciplinskog postupka protiv takmičara, vozača i sportskih funkcionera disciplinskom sudiji mogu podnijeti:

- sportski forumi i izvršni organi Komisije za auto, moto i karting sport,
- žiri takmičenja,
- izvršni funkcioneri takmičenja,
- delegati takmičenja,
- takmičari i vozači - učesnici takmičenja.

Član 15.

Zahtjev za pokretanje disciplinskog postupka protiv organizatora takmičenja, organizacija BIHAMK - a i drugih pravnih lica disciplinskom sudiji mogu podnijeti: sportski forumi i izvršni organi Klubova, Komisija za auto, moto i karting sport, Upravni odbor BIHAMK - a, žiri takmičenja i delegati takmičenja.

Član 16.

Zahtjev za pokretanje disciplinskog postupka mora biti podnjet u roku od pet dana od saznanja za prestup. Zahtjev podnjet u ime pravnog lica mora biti ovjeren pečatom tog pravnog lica ili mu mora biti priloženo punomoćje pravnog lica izdano za podnošenje zahtjeva za pokretanje disciplinskog postupka.

Član 17.

Zahtjev za pokretanje disciplinskog postupka mora biti jasno formulisan, obrazložen i dokumentovan, i u njemu mora biti tačno naznačeno protiv koga se zahtjeva pokretanje disciplinskog postupka i za koji disciplinski prestup.

Član 18.

Neblagovremen, neosnovan, nejasan, neobrazložen i nedokumentovan zahtjev, kao i zahtjev podnjet od neovlaštenog lica disciplinski sudija će rješenjem odbaciti.

IV Disciplinski postupak

Član 19.

Po prijemu zahtjeva za pokretanje disciplinskog postupka, disciplinski sudija, ukoliko nije donio rješenje o odbacivanju zahtjeva, donosi rješenje o vođenju disciplinskog postupka i odlučuje o izricanju suspenzije u određenoj ili svim disciplinama. Protiv odluke o suspenziji nije dozvoljena posebna žalba.

Član 20.

Suspenziju će disciplinski sudija izreći uvijek kada ocjeni da je to nužno radi nesmetanog vođenja disciplinskog postupka i normalnog odvijanja sistema takmičenja, a na osnovu navoda u zahtjevu za pokretanje postupka. Disciplinski sudija obavezno izriče suspenziju u svim slučajevima kada donese rješenje o vođenju postupka za prestupe iz člana 37 i 38. ovog Pravilnika.

Član 21.

Disciplinski sudija je obavezan da o pokretanju disciplinskog postupka odluči najhitnije, a o eventualnom izricanju suspenzije u roku od osam dana od prijema zahtjeva.

Član 22.

Disciplinski sudija koji je po prijemu zahtjeva izrekao suspenziju dužan je da u roku od trideset dana od dana izricanja suspenzija odluči u disciplinskom postupku ili o prestanku suspenzije. Istekom ovog roka, suspenzija prestaje a disciplinski postupak se nastavlja.

Član 23.

Vrijeme provedeno pod suspenzijom uračunat će se u izrečenu mjeru u potpunosti, ukoliko je izrečena mjera u vremenskom trajanju, a u slučaju izricanja mjere zabrana učešća i vršenja funkcije na određenom broju takmičenja i u određenoj disciplini, u izrečenu mjeru uračunat će se samo broj

takmičenja ove discipline, a koja su protekla za vrijeme suspenzije.

Član 24.

Nakon donošenja rješenja o vođenju postupka, disciplinski sudija dostavlja primjerak zahtjeva sa prilogima licu protiv koga je pokrenuo postupak i poziva ga da se lično pred disciplinskim sudijom, ili pismeno u izjavi, izjasni o navodima zahtjeva i eventualnom disciplinskom prestupu.

Član 25.

Disciplinski sudija je dužan da licu protiv koga je pokrenuo postupak ostavi potreban rok za izjašnjenje. Po proteku ovog roka disciplinski sudija izvodi druge dokaze nužne za utvrđivanje postojanja ili nepostojanja disciplinskog prestupa i donosi svoju odluku po zahtjevu za pokretanje disciplinskog postupka.

Član 26.

Svi sportski forumi i izvršni organi klubova, sportski funkcioneri, takmičari i vozači, dužni su odazvati se pozivu disciplinskog sudije, pružiti mu punu pomoć u utvrđivanju činjenica u disciplinskom postupku koji je pokrenuo i dostaviti tražena dokumenta i izjave. U protivnom i sami podliježu disciplinskoj odgovornosti.

Član 27.

Ukoliko do isteka mandata disciplinskog sudije, postupak ne bude okončan, disciplinski sudija će postupak okončati i poslije isteka mandata.

V Disciplinske mjere

Član 28.

Disciplinski sudija, nakon okončanja dokazanog postupka, ocjenjuje dokaze po svom slobodnom uvjerenju, a odluku donosi na osnovu utvrđenih činjenica i nije obavezan poštivati kvalifikaciju disciplinskog prestupa danu u zahtjevu.

Član 29.

Disciplinski sudija će rješenjem obustaviti disciplinski postupak ukoliko nađe da disciplinski prestup nije učinjen ili pak da nema dokaza za njegovo izvršenje.

Član 30.

Kada utvrdi postojanje disciplinske odgovornosti i da je disciplinski prestup izvršen od strane lica protiv koga je postupak pokrenut, disciplinski sudija ovo lice oglašava odgovornim i izriče mu disciplinsku mjeru. Disciplinski sudija prilikom izricanja disciplinske mjere može ukinuti suspenziju, ukoliko je ova bila izrečena, ili izreći suspenziju ukoliko nije bila izrečena prilikom pokretanja postupka. Trajanje ovako izrečene suspenzije nije ograničeno rokom.

Član 31.

Disciplinske mjere za takmičare, vozače, sportske funkcionere i druga fizička lica su: pismeni javni ukor, novčana kazna, zabrana učestvovanja i vršenja funkcija na svim ili određenim takmičenjima u određenom vremenskom periodu i doživotna zabrana učešća i vršenja funkcija na svim takmičenjima - diskvalifikacija, novčana kazna kao dodatna i oduzimanje bodova (samo za karting).

Član 32.

Disciplinske mjere za takmičare, organizatore takmičenja i druga pravna lica su: pismeni javni ukor, novčana kazna, zabrana organizovanja ili učestvovanja na određenim ili svim takmičenjima u određenom vremenskom periodu, novčana kazna kao dodatna i oduzimanje bodova (samo za karting).

Član 33.

1. Pismeni javni ukor izriče se povrede odredaba pravilnika koje su učinjene nesvjesno i nemaju ozbiljnih posljedica na sam tok takmičenja, ugled auto, moto i karting sporta, Komisije za auto, moto i karting sport i BIHAMK - a.

2. Novčana kazna izriče se takmičarima, vozačima, sportskim funkcionerima i drugim fizičkim licima za:

- povrede odredaba pravilnika i prestupe koji nemaju ozbiljnih posljedica na sam tok takmičenja kao i kršenje normi sportskog ponašanja;
- ako se u toku završetka takmičenja utvrdi neispravnost sigurnosne opreme vozila (rolbar, vatrogasni aparat, sigurnosni pojas, prekidači za struju, sigurnosne kopče za haube, kuke za vuču vozila i sl.), nedostatak ili neispravnost opreme na vozilu (unutrašnji tapacirung, patosnice, suncobrani, police, plastični zaštitnici iznad točkova, zavjesice, rukohvati, rezervni točak, alat, dizalica i sl.), prekoračenje

dozvoljenog nivoa buke, nepropisno korištenje sigurnosne opreme za vozače (kaciga, vozački kombinezon, rukavice, duboke patike, čizme i sl.), nedostatak oznaka na vozilu i slično. Ovu novčanu kaznu na samom takmičenju izriče žiri takmičenja na prijedlog izvršnih funkcionera i delegata. Kazna se plaća u roku od 5 dana na žiro račun BIHAMK - a. Na ovako izrečenu kaznu dozvoljena je žalba Komisiji za auto, moto i karting sport, ali uložena žalba ne zadržava izvršenje kazne.

3. Novčana kazna i brisanje plasmana sa tog takmičenja izriče se vozačima koji učestvuju na takmičenjima sa vozilom na kome su, prema nalazu delegata Tehničke komisije izvršene nedozvoljene prepravke neznatnog obima. Ovu Novčanu kaznu na samom takmičenju izriče žiri takmičenja na prijedlog izvršnih funkcionera i delegata. Kazna se plaća u roku od 5 dana na žiro račun BIHAMK - a. Na svako izrečenu kaznu dozvoljena je žalba odgovarajućoj stručnoj komisiji BIHAMK - a, ali uložena žalba ne zadržava izvršenje kazne. Evidenciju o svim kaznama vodi stručna služba BIHAMK - a.

Član 34.

Novčana kazna izriče se organizatorima takmičenja Klubu i drugim pravnim licima za neodržavanje takmičenja upisanih u kalendar (izuzev kada se radi o razlozima više sile), bojkot takmičenja, ovjeravanje takmičarskih prijavi za vozila na kojima se utvrde nedozvoljene prepravke, neizvršenje preuzetih materijalnih obaveza povodom takmičenja, neistinito prikazivanje događaja u javnosti, a naročito preko sredstava javnog informisanja i ostale propuste u organizaciji takmičenja koji su mogli uticati ili su uticali na regularnost takmičenja, kao i za incidente učinjene na takmičenjima sa namjerom da se određeni Klub dovede u povoljniji položaj, a da nisu predviđeni u daljim odredbama o kažnjavanju.

Član 35.

Novčana kazna kao sporedna izriče se takmičarima, vozačima, sportskim funkcionerima, organizatorima takmičenja i drugim pravnim i fizičkim licima uz izrečene mjere za prestupe iz člana 37 i 38. ovog Pravilnika, ukoliko disciplinski sudija ocjeni da je radi postizanja svrhe disciplinskih mjera potrebno njeno izricanje.

Član 36.

Visina novčane kazne za takmičare ili sportske funkcionere je u rasponu od 10 KM (za sitne prekršaje definisane raznim pravilnicima) do 2000 KM, dok je raspon novčanih kazni za klubove od 50 KM do 5000 KM. Izrečene novčane kazne uplaćuju se na žiro račun BIHAMK - a, u fond za razvoj sporta, u roku od pet dana od dana izvršnosti, a neuplaćivanje kazne povlači disciplinsku odgovornost prema ovom Pravilniku. Zahtjev za pokretanje disciplinskog postupka podnosi Predsjednik Komisije za licenciranje, verifikacije i obradu podataka, odnosno Glavni disciplinski sudija.

Član 37.

Zabrana učestvovanja i vršenja funkcija na takmičenju izriče se takmičarima, vozačima i sportskim funkcionerima i drugim fizičkim licima u trajanju:

- **do 3 mjeseca ili do 3 takmičenja** za: nesportsko ponašanje, svađu i psovanje, odbijanje izvršenja naređenja izvršnih funkcionera, prijetnja fizičkim napadom, učestvovanje na takmičenju sa vozilom na kome su prema nalazu tehničke komisije izvršene nedozvoljene prepravke manjeg obima i sl;

- **od 3 do 6 mjeseci ili 3 do 6 takmičenjima** za: demonstrativno napuštanje takmičenja, prihvatanje nagovaranja za bojkot daljeg takmičenja, nastupanje na takmičenju bez odobrenja ili bez ispunjavanja potrebnih uslova; učestvovanja na takmičenju sa vozilom na kome su prema nalazu tehničke komisije izvršene nedozvoljene prepravke srednjeg obima; namjerno kršenje odredaba sportskih pravilnika; davanje lažnih podataka; nepravilno izvođenje takmičarskih elemenata; namjerno ometanje drugih vozača na stazi; pristrasnost i neobjektivnost u radu; učešće bez odgovarajuće dozvole na takmičenju koje nije upisano u kalendar; neistinito prikazivanje događaja u javnosti a naročito preko sredstava javnog informisanja; vrijeđanje organizatora, Komisije za auto, moto i karting sport ili BIHAMK - a, kao i predstavnika navedenih pravnih subjekata, a naročito preko sredstava javnog informisanja; neispunjavanje materijalnih obaveza, odbijanje nastupa za reprezentaciju; prikrivanje drugih prestupnika; napuštanje funkcija za vrijeme takmičenja ili slično;

- **od 6 do 12 mjeseci ili od 6 do 12 takmičenja** za: fizički napad, pogublenu vožnju na takmičenju, nesportsko ponašanje na takmičenju u inostranstvu, vrijeđanje i klevetanje sportskih foruma i funkcionera Komisije za auto, moto i karting sport, odnosno BIHAMK - a; grubu povredu sportskih pravilnika koja ima za posljedicu ometanje normalnog izvođenja takmičenja; grube greške u radu izvršenih funkcionera sa posljedicama ometanja normalnog izvođenja takmičara; greške u radu sportskih funkcionera koje direktno utiču na plasman na takmičenju; nagovaranje takmičara i funkcionera na organizovani bojkot daljeg takmičenja; učestvovanje na takmičenju sa vozilom na kome su prema nalazu tehničke komisije izvršene nedozvoljene prepravke većeg obima ili onemogućavanje pregleda vozila po prigovoru ili zahtjevu

delegata Tehničke komisije; nastupanje na takmičenju za vrijeme zabrane izrečene od strane zdravstvenih organa; nastupanje na takmičenju i vršenje funkcija za vrijeme suspenzije ili trajanja disciplinske mjere; podmičivanja ili primanje mita takmičara ili sportskih funkcionera; namještanje plasmana na takmičenjima; povrede pravilnika u vezi sa prelaznim rokom; falsifikovanje dokumenata na takmičenju (licenci, zapisnika, putne knjige i sl.); lažno svjedočenje u disciplinskom postupku; svojim postupcima i ponašanjem nanose štetu auto, moto i karting sportu i sl.

- od 12 do 24 mjeseci ili od 12 do 24 takmičenja za: fizički obračun, fizički napad na izvršenog funkcionera i delegata na takmičenju, pogibeljnu vožnju na takmičenju koja ima za posljedicu udes, povredu sportskih pravilnika sa posljedicama prekida takmičenja, greške u radu izvršnih funkcionera sa posljedicama prekida takmičenja, fizički obračun na takmičenju u inostranstvu, organizovanje bojkota takmičenja ili sjednice sportskih foruma, nastupanje ili organizovanje nastupa takmičara u inostranstvu bez dozvole Komisije za auto, moto i karting sport i sl.

Za određivanje obima tehničkih prepravki na vozilima, zaduženi su voditelji TKO na pojedinim takmičenjima.

Mjere zabrana učestvovanja i novčana kazna mogu se za počinjene prekršaje izreći kao zasebne kazne ili se mogu izreći zajedno, ovisno o vrsti i težini počinjenog prijestupa.

Disciplinske mjere / vrsta prekršaja za karting:

1. oduzimanje bodova na takmičenju + zabrana učestvovanja na jednom takmičenju s novčanom kaznom od 250 KM
 - učestvovanje na takmičenjima s vozilom na kojem su prema nalazu tehničke komisije organizatora obavljene nedozvoljene prepravke manjeg obima
2. oduzimanje bodova na takmičenju + zabrana učestvovanja na dva takmičenja s novčanom kaznom od 500 KM
 - učestvovanje na takmičenjima s vozilom na kojem su prema nalazu tehničke komisije organizatora obavljene nedozvoljene prepravke srednjeg obima,
3. oduzimanje bodova na takmičenju + zabrana učestvovanje na tri takmičenja s novčanom kaznom od 750 KM
 - učestvovanje na takmičenjima s vozilom na kojem su prema nalazu tehničke komisije organizatora obavljene nedozvoljene prepravke većeg obima,

Član 38.

Zabrana organizovanja ili učestvovanja na takmičenjima izriče se organizatorima takmičenja ili drugim pravnim licima u trajanju:

1. do 12 mjeseci za: - prihvatanje i prijavljivanje na takmičenje takmičara i vozača koji nemaju potrebna odobrenja ili koji su suspendovani ili im teče zabrana nastupanja, neispunjavanje materijalne obaveze po odlukama organa Komisije za auto, moto i karting sport i žirija i delegata tehničke komisije na takmičenju, povreda sportskih pravilnika koja ima za posljedicu izvođenje takmičenja pod različitim uslovima za pojedine takmičare ili slično;
2. od 12 do 36 mjeseci za: - povreda sportskih pravilnika koja je imala za posljedicu neregularno odvijanje, prekid ili otkazivanje takmičenja, greške za vrijeme takmičenja koje su prouzrokovale udes, slabo obezbjeđivanje publike i vozača ili slično.

Član 39.

Diskvalifikacija se izriče vozačima takmičarima, sportskim funkcionerima i drugim fizičkim licima za: - teške povrede odredaba sportskih pravilnika koje su prouzrokovale teže udes na takmičenjima, uporno odbijanje izvršenja naređenja izvršnih funkcionera uslijed čega je došlo do udesa na takmičenju sa težim posljedicama, grube greške izvršnih funkcionera koje prouzrokuju teške posljedice i udes na takmičenju ili slično. Ova mjera može biti izrečena takmičarima, vozačima, sportskim funkcionerima i drugim fizičkim licima i u slučaju višestrukog ponavljanja grubih disciplinskih prestupa iz člana 37. ovog Pravilnika.

Član 40.

Ukoliko povredu sportskih pravilnika učini strano lice na međunarodnom takmičenju u Bosni i Hercegovini, disciplinske mjere će se izreći kao da je u pitanju domaće lice, a o tome će se izvjestiti ASN, odnosno FMN lica koje je učinilo disciplinski prestup.

Ukoliko povredu sportskog pravilnika, u karting takmičenju, učini lice na koje se ne može primjeniti

disciplinska mjera, ili je primjena mjere ne cjelishodna, disciplinski sudija može izreći mjeru Klubu u čiju korist je učinjena povreda.

Za nedozvoljene prepravke na kartingu, disciplinski sudija može, pored predviđenih mjera iz pravilnika, izricati i novčane kazne roditeljima, klubovima, mehaničarima i drugim pravnim i fizičkim licima koja se u ma kojem obliku mogu dovesti u vezu sa ovim povredama, što će disciplinski sudija cijeliti u smislu člana 28. Posebnog pravilnika o disciplinskoj odgovornosti.

Član 41.

Prilikom odmjeravanja disciplinske mjere izvršioca prestupa uzeće se u obzir sve okolnosti koje utiču na visinu mjere, kako otežavajuće tako i olakšavajuće, a naročito će se cijeliti izazvane posljedice, stepen odgovornosti izvršioca, pobude i način na koji je prestup izvršen, moralne osobine učinioca, držanje i ponašanje prije i poslije učinjenog prestupa, i za vrijeme vođenja disciplinskog postupka.

Član 42.

U slučaju izvršenja više prestupa, prethodno se utvrđuje visina mjere za svaki prestup, a potom izriče jedinstvena disciplinska mjera, koja ne može biti manja niti preći dvostruku visinu najteže utvrđene mjere.

Član 43.

Vrijeme trajanja disciplinske mjere mora biti posebno naznačeno u rješenju, kao i rang takmičenja i grana, odnosno, discipline auto, moto karting sporta na koje se zabrana nastupa odnosi.

Disciplinske mjere u vremenskom trajanju ne mogu se izreći ako njen veći dio treba da protekne u vrijeme van sezone.

Disciplinska mjera u broju takmičenja i vremenskom trajanju može se izreći za rang Šampionata BiH, Kup takmičenja i međunarodna takmičenja i to u grani, disciplini ili u svim granama ili svim disciplinama auto, moto ili karting sporta. Za prekršaje iz člana 37. i 39., obavezno se izriče zabrana za sve rangove takmičenja i sve discipline auto, moto ili karting sporta.

Ukoliko je utvrđen prekršaj učestvovanja sa vozilom na kome su izvršene nedozvoljene prepravke, disciplinska mjera izriče se samo za rang takmičenja i disciplinu u kojoj je napravljen prekršaj.

Član 44.

Ukoliko je izrečena mjera zabrane učešća ili vršenja funkcija na određenom broju takmičenja, u disciplinsku mjeru računat će se samo takmičenja sa rangom, granom i disciplinom za koje je mjera izrečena.

Član 45.

Brisanje rezultata sa takmičenja na kome ili u vezi sa kojim je izvršen disciplinski prestup vrši se uvijek kada se takmičaru ili vozaču izrekne disciplinska mjera iz člana 37 i 39. i člana 33. tačka 2. ovog Pravilnika. Takmičenje sa koga je takmičar, vozač ili sportski funkcioner isključen ili povodom koga je vođen disciplinski postupak neće se uračunati u broj takmičenja na koja se odnosi izrečena mjera zabrane učešća ili vršenja funkcije.

Član 46.

Ako se prilikom odmjeravanja mjere utvrdi da nisu prouzrokovane teže posljedice i da postoje osobito olakšavajuće okolnosti koje ukazuju da se i samo prijetnjom mjerom može postići svrha izricanja mjere, može se izreći uslovna mjera. Izricanjem uslovne mjere, učiniocu se utvrđuje trajanje mjere i istovremeno određuje da se ona neće izvršiti pod uslovom da učinilac u ostavljenom roku, koji ne može biti kraći od tri mjeseca niti duži od dvanaest mjeseci, ne učini novi prestup.

VI Troškovi disciplinskog postupka

Član 47.

Prilikom odlučivanja o kažnjavanju disciplinski sudija će odlukom kojom izriče disciplinsku mjeru, obavezati kažnjeno lice i na naknadu troškova disciplinskog postupka i plaćanje takse. Visinu troškova određuje disciplinski sudija, a na osnovu evidencije o toku i troškovima postupka.

VII Žalbe i vanredno ublažavanje mjera

Član 48.

Protiv odluke o izricanju disciplinskih mjera mogu se podnijeti žalbe nadležnom drugostepenom disciplinskom organu. Izuzetno ako je odlukom drugostepenog disciplinskog organa izrečena ili potvrđena mjera diskvalifikacije, može se uložiti žalba na ovu odluku Komisiji za auto, moto i karting sport .

Žalbe mogu podnijeti i lice kome je izrečena mjera, njegov matični Klub i podnosilac zahtjeva.

Žalbe moraju biti podnesene u roku od osam dana od dana prijema odluke i moraju biti jasno formulisane,

obrazložene i dokumentovane.

Član 49.

Sve žalbe moraju biti riješene od strane drugostepenog disciplinskog organa u roku od 20 dana, od dana prijema.

Član 50.

Posebnom odlukom Komisije za auto, moto i karting sport, svake godine će se propisivati visina takse za podnošenje žalbe u disciplinskom postupku.

Član 51.

Komisija za auto, moto i karting sport, kao vrhovni sportsko - stručni organ, može vanredno ublažiti izrečenu disciplinsku mjeru.

Vanredno ublažavanje mjera izriče se po molbi kažnjenog lica ili na prijedlog sportskih foruma i izvršnih organa Kluba, ako za to postoje naročito važni razlozi i okolnosti koje ovako ublažavanje opravdaju.

VIII. Obnova postupka

Član 52.

Pokretači disciplinskog postupka, vozači, suvozači, sudije, natjecatelji, organizatori i ostale pravne osobe kojima je izrečena disciplinska mjera, mogu protiv konačne odluke o mjeri tražiti obnavljanje disciplinskog postupka ako se dokaže da je rješenje o mjeri zasnovano na lažnoj izjavi ili lažnom svjedočenju ili ako se ustanove nove činjenice ili podnesu novi dokazi koji bi vjerojatno bili uzrokom drugačijeg rješenja da su bili poznati tijekom ranije vođenog disciplinskog postupka.

Zahtjev za ponavljanje postupka može se podnijeti najkasnije u roku tri mjeseca računajući od dana kada je odluka disciplinskog sudije ili Disciplinske komisije postala konačna. Zahtjev se upućuje Disciplinskoj komisiji koja će, ukoliko isti smatra opravdanim, donijeti rješenje o obnovi postupka, te predmet uputiti disciplinskom sudiji na ponovni postupak.

Ukoliko Disciplinska komisija donese odluku da se zahtjev za obnovu postupka odbija, protiv ove odluke ne postoji mogućnost žalbe.

IX. Materijalna odgovornost

Član 53.

Svi učesnici auto, moto i karting takmičenja / natjecanja, vozači, suvozači, sudije, natjecatelji, organizatori natjecanja / takmičenja i druge pravne osobe koje učestvuju na natjecanju / takmičenju, za sve štete koje nanese trećim osobama, podliježu materijalnoj odgovornosti u skladu sa pozitivnim propisima BiH.

X. Prijelazne i završne odredbe

Član 54.

Izmjene i dopune ovog Pravilnika vrše se po istom postupku koji važi i za njegovo donošenje.

Pravo tumačenja ovog Pravilnika ima Komisija za auto, moto i karting sport.

Ovaj pravilnik stupa na snagu danom njegovog donošenja.

Predsjednik Komisije za auto, moto i karting sport

Ozren Božanović